



SÂSTU CE? ... CELTIC! Balon e identitât ator pe Europe



Intal Novembar dal 2012 tancj di lôr a son restâts maraveâts dal risultât di Celtic – Barcelone, partide zuiade intun ziron di cualificazion de Champions League di chel an. A sorprese, al “Celtic Park” di Glasgow, i blancs e verts a àn batût il Barça par 2-1, cundud di un assedi blaugrana costant ma cetant steril.

Al è stât cence dubi il coronament di une serade speciâl, là che si celebra vin i 125 agns dal Club, scomençade cuntune straordenarie coreografie a mosaic a plen stadi e il “solit” ambient cjamât di tante passion, soredu intal moment che i sessante mil a àn cjantât a plene vôs “You’ll never walk alone”,

il stes imni dal Liverpool.

Za dôs setemanis prime in Catalogne il mont dal sport al jere restât impresionât de invasion celtiche une vore pacifiche ma plui di cualchidun però nol rivave a capî cemût mai che i tifôs dal Celtic a puartassin bandieris irlandesis e no scozesis.

Il Club al è stât fondât ai 6 di Novembar dal 1887 di un predi marist, brother Walfrid, par tirâ sù fonts in favôr dai imigrâts irlandês, a chel timp int tra la plui disperade e tibiade de citât. Walfrid, originari de contee di Sligo, al intindeve lâ daûr dal esempli dal Hibernian, un altri club costituît cul stes fin a Edimburc intal 1875.

Propit in chê che e jere la zone plui puare di Glasgow, l’East End, si jerin logâts tancj irlandês rivâts a miârs soredu dopo la Grande Cjaristie

(1845-49), une tragjedie che e à causât un milion di vitimis e ancjetancj emigrants. La Scozie e Glasgow a costituivin une des destinazions plui dongje ae isule verde, ae epoche sot dal domini de Corone britaniche.

Il prin stadi al è stât costruît dai stes tifôs e la prime partide zuiade ai 28 di Mai dal 1888 (par chest motif la date e je intal simbul dal Club) propri cuintri i storic rivâi dai Rangers, batûts par 5-2.

E scomençà in chê volte la rivalitât tra lis dôs scuadris principâls de citât e dal país: une orgoi de contrastade comunitât catoliche e chê altre baluart de tradizion protestante.

Dutis dôs a rapresentin une storie centenarie di passions fuartis, afiet pe scuadre e pe proprie coletivitât, ma ancje di violencis setariis.

L’Old Firm, il derby di Glasgow, al è un di chei plui infogâts al mont e intai agns al à cjaminât sù significâts che a van ben di là de sfer sportive. Par fâsi une idee, dome intal 1989 al à firmât pai Rangers il prin zuiadôr catolic: al è stât il cás celebri di Mo Johnston, calciât un traditôr dai ultras blancs e verts, ma ancje di chei blu, che a ritignivin il so acuist un repudi ai “valôrs” de lôr scuadre par vè viertis lis puartis ancje ai no protestants.

Ben prin de maree inglese, al è stât il Celtic il prin club britanic a conquistâ la Cope dai Campions: vuidât dal mai dismenteât alenadôr Jock Stein, intal 1967 al à batût a Lisbone l’Inter di Helenio Herrera par 2-1. Si conte che chê



volte duç i zuiadôrs a vignivin al massim di 30 mis di Parkhead, la zone dal stadi. Trê agns dopo il Celtic al rivâ di gnûf ae finâl ma al fo batût

par 1-2 ai suplementârs dal Feijenoord di Rotterdam a San Siro.

Chei tims a son lontans, aromai ancje al Celtic a son rivâts zuiadôrs di duç i país tant che il svedês Henrik Larsson che in siet agns al circol al à marçjât 242 rêts e al è diventât un dai idui dai tifôs. Cundud dai risultâts sportîfs a nivel europeu pôc sflandorôs dai ultins agns, i tifôs blancs e verts a son cognossûts par jessi tra chei plui entusiascj, positîfs e corets (forsit cu lis unichis ecezions des batais dal passât tal derby di Glasgow).

Un episodi unic inte storie dal balon al è stât l’esodi pe finâl di Cope UEFA dal 2003 a Siviglia invadude di otante mil siei tifôs, la plui part partide cence biliet. Tant entusiasim e tante passion e à concuistât simpatizants e clubs di tifôs par ogni cjanton, ancje in Italie.

Dal 2009 la passion verde e à cjaminât ancje a Udin in graciis di Paul Rinaldi, un simpatic professôr di inglês nassût a Glasgow cul pari di divignince toscane che al à fondât il Celtic Club di Udin. In graciis di chest Club, intal 2011, al Stadi Friûl pe partide dal ziron di cualificazion di Europe League, e tal prepartide tes stradis di Udin, la nudride patulie di tifôs scozês e à vût il bon acet dai furlans al spruc di “Dôs scuadris unidis de stesse passion”.

Alessandro Gori

Par cure de Agenzie Regionâl pe Lenghe Furlane